

## ■ GLOSSA

# HR Giger, marginalisà, betg resguardà, guarda giu da tschiel e pensa...

DA SILVIO CAMENISCH

**E**n l'ester sun jau stà Eplacat represchentant, Aushängeschild, da noss pajais. En l'agen pajais sun jau stà in ester. Ils museums d'art renumads, da num e da pum da la Svizra n'han betg vuli savair insatge da mai. Per quels sun jau da nà ennà stà nagut meglier ch'in asilant da Valzeina u Löwenberg en mes charezzà pajais. Berna è dapertut e vegn festivà mumentan, tut varga, en la sauna da cultura e litteratura. Valzeina e Löwenberg er dapertut e vegn marginalisà da durada.

**M**es bab beà, apoteker en il vegl Cuir, aveva per moda da dir: Taidla, Hans Ruedi, i va adina in pau sco quai ch'i vul, en la cultura. Ti dovras bleras tabletas cun vitamins B, duas a di, ina la damaun ina la saira. E dovras ils dretgs padrins da la mafia artistica, madritschas er. Èn quels e quellas per tai, vegns ti auzà en la posiziun da confidenzial, uss èn quels cunter tai, quels èn cunter mai, vegns ti liquidà mazà cun entiras salvias da sajets, so, sch'i sto esser durant l'auzar si u durant ina processiu cun baldachin e la Mater dolorosa purtada sin givels da quatter, cun guants alvs.



**L**a scena d'art etablida, ha repetidamain marginalisà mai e mias lavurs, betg cun bluttas stgigas, na, na, cun ferm arguments: memia stgir, memia ester, memia sexistic. N'han betg gist quels adina vuli stgir en la sala polivalenta, per pudair sa metter sezs en meglra glisch e n'èn betg quels adina ids gugent en l'ester sco nunzis da nossa chausa e n'han quels mai mai gi sex tranter medems en la sauna durant tut lasuenter avant ils Dis d'aduraziun ed exposiziun dals sontgissims? Voilà.

**J**au guard giu da tschiel, senza gritta, sin la schiccaria culturala, quella gist festivescha sasezza. Faschess jau er, fiss jau quella. Esser in ami d'ami, eines Freundes Freund zu sein, cun citar libramain Goethe, la fi-

namira dal di e da la notg. Dastga er esser gugent ami da bliers amis ed amias er en la sauna da cultura e litteratura, rumantscha. Oje, qua na sun jau betg en il dretg l'auter mund, desiderat da mintga bun catolic da la cultura etablida, la dretga. Jau hai creà la fallada, sun vegn marginalisà malamain persuenter. Grazia fitg. Enturn mai naginas pitgas sontgas u colonnas, sontgs nums vegnids fatsgs, tut dals noss. Jau na sun betg vengiant da prender quels en mia bucca cun tragutter, ils bels nums.

**J**au na fiss betg stà vengiant da vegnir mo inagiada maindir bleras giadas sut tes tetg e mussar in maletg sprizzà en mia charezzada tecnica innovativa la Air-Brush-Technik e pront fiss mia olma daventa sauna. Na. En la sauna stippa chauda da cultura betg main litteratura na lain nus betg mintgin. Pudess uss mintgin vegnir e vulair. Tgi che merita, ch'è meritaivel, schain nus. Nus essan l'elita la vardad e la vita perpetna, senza nus na va qua nagut, quai è uschia, di in uvestg da la cultura.

**E**ls han mess giu in cranz, in cranz, cunter mia plastica d'Alien bittada en in chagliom dador la chasa dals arts davant il kincocenter...